



21. maj 2025

Inatsisartut suleriaasianni § 37 imm. 1 naapertorlugu Naalakkersuisunut apeqquteqaat imaattoq matumuuna saqqummiuppara.

Naalakkersuisunut apeqqutit:

1. Nunatta kujataani angallannikkut kiffartuussinissamik isumaqatigiissuteqarfigineqarsimasup, Disko Linep, umiarsuaarassaa Maliina Ittuk angallassisalernissaa kiisami qallivoq. Ilumoorpa umiarsuaaraq pineqartoq Qaqortup Narsarsuullu akornanni kisimi angallassisassasoq?
 - a. Taamaasimappat sooruna?
2. Maliina Ittuk Qaqortumiit Nanortalimmut utimullu aamma angallassisarnissaminik pilersaaruteqarpa?
3. Maliina Ittuk nunaqarfinnut, soorlu kujaterpiaanut Narsarmijinut aammalu Aappilattumut angallassisarnissaminut pilersaaruteqarpa?

(Inatsisartunut ilaasortaq Anders Olsen, Siumut)

Tunngavilersuut:

Nunatta kujataani angallanneq eqaannerusoq isumannaannerusorlu pisariaqartipparput. Tusagassiorfitsigut atuarneqarsinnaavoq umiarsuaaraq nutaaq Maliina Ittuk kiisami nunatsinnukassalluni piareerluinnalersoq. Atuarneqarsinnaavortaaq umiarsuaaraq Qaqortup Narsarsuullu akornanni angallassisarniartoq. Tamanna ilumoorsimappat nunatta kujaterpaani najugallit aasiit eqqornerlunneqartussanngorput.

Kiffartuussinissamik isumaqatigiissut sularineqarmat siunertaavoq kujataani angallannikkut ataqatigiinnerusumik isumannaannerusumillu ingerlatsisoqassasoq.

Ilumoorsinnaanngilaq Maliina Ittuk taamaallaat Qaqortup Narsarsuullu akornanni angallassisarniaruni, tassami nunatta kujaterpiaa imarluttartorsuuvoq angallavigiuminaattaqalunilu angallassissutitut mikinerusunut. Taamaammat isumaqarpunga minnerpaamik Maliina Ittuk Nanortalimmut Alluitsup paanullu aamma angallassisariaqartoq, taamatuttaaq pisariaqarfiini nunaqarfiit kujallerpaat Narsarmijit Aappilattorlu ilanngullugit.

Apeqqutigineqartut ullut suliffiusut qulit iluanni akeqquneqarput.